

Efeso nenacaauru rai

Faborhacha letoai

“Chatohaneeiche,” naa Faborone

1 ¹Canune, Cana Coaunera jerenohineein rai Calaohi Jesocurisito cococainanohineein rai afosoto Faboro neeun. Efeso satiin, Cana Coaunera cachaneein rai Calaohi Jesocurisito esenetaeraauru raine caa quiricha laenaan. ²Cana Coaunera aina rai Calaohi Jesocurisito inara rai raotojoein neeichene jaanu teuruhinete raotojoein neeiche.

Naaonjoainte Jesocurisito aina cuaain rai cachaauru rausiaje.

³Cana Curuaanaa Jesocurisito Inaca Cana Coaunera coroaecaachenete ne. Acate dedeeu cana suujue que itolere caohacha ichaain cana rausiaje, rai Calaohi Jesocurisito cachaneein nihacachene jaun. ⁴Jaiti cana rai chauratane coaunaane ajinhate, cana janijiin cana raain nelu Cana Coaunera, rai Calaohi Jesocurisito aina cuaain cha ujuaihonelanaala notaracae que banijiainei rai cachaneein nena coina. ⁵Jataain cana belaihane jaunte, rai Calaohi Jesocurisito aina cuaain rai calaohineein nena coina ichae Cana Coaunera, nitohaneein coausihalune rijijieein. ⁶Nitohaneein raotojoein nena coina cana belaiha cana

rausiaeca jataain niicha belai- rai Calaohi Jesocurisito aina cuaaine corenihate, itolere bana Cana Coaunera coroaecaache. ⁷Jataain cana belaitohane jaunte, rai Calaohi coichana aina cuaain cana osa caje cana rocohin, cana que suujua acatelu Cana Coaunera. ⁸Nii cana rai itolere coitucuhin, itolere que nainaan, naaonjoain ichaohacachene jaannu tihane cajete jataain cana belaitohane coitucuhacache. ⁹Chaen techu nitohaneein cana belaitohane jaun, cana que nii asinojoneein nena niicha ichaneni niicha coacui coitucuerate. ¹⁰Inae cuu tihane banate, nii aitiin coaualune rijijieein nii naitoonjoan nainaan, satiin nere tonoraauruha chauratane que nenacaauru, dedeeu nenacaauru, naaonjoainurine coina satiin curuaanaaneein rai Calaohi terein Cana Coaunera.

¹¹Acate cana janijiin cana raain nelu, rai Calaohi Jesocurisito aina cuaain rai calaohi rijijieein cana que banihatein niicha rucujuei tiha nii coausihalune rijijieein, niicha jerei ichaane coina. ¹²Nitohaneeinte jauriaanejeein cana raain nelu Cana Coaunera, rai Calaohi Jesocurisito esenetaain queecha jaaequiin ichaohacachene, cana ichao coaraain, niicha ichai coroaecuruha cachaaurune coina. ¹³Nii rijijieein

techu, esinae rauhijiriin inara osa caje nichoteriquicheeine beeuruhane aonaain, Jesocurisito esenetaain jerihane rijijieein ichaohichene jaun, rai Suujue aina cuaain rai cachanequichene cojunacate Cana Coaunera, nitohaneein ichaane coina aitothalune rijijieein. ¹⁴Rai Suujuete nii cana que banihateein niicha rucujuei tihane jaan rarichaa-cheeinne cojunacaneein ne. Nitohaneinte ichareein Cana Coaunera, satiiin nosa caje ichoteratenojoniha rai cachaneein neenihurune coaraain, itolere ichana nainihane coitucuhin coroaecuruha cachaaaurune coina.

**Coitucuurera rai, cha coitucuuruhane
jaanu tiha Cana Coaunerane
coina bajaa Faborone.**

¹⁵Nitohanihane jaunne, Cana Curuaanaa Jesocurisito esenetaain, satiiin Cana Coaunera cachaneein nenacaauru aina ita belaiin neeichene coitucuhanune jaun, ¹⁶inara coreniha bajaanune nainein inara coacuhin, Cana Coaunera coroaenajacoon. ¹⁷Cana Curuaanaa Jesocurisito Inaca necaoha-chaain nenea Cana Coaunera cajene bajaaun, inara rai inara suujue cuhane chacoitucuhin neeichene jaanu tihane, nii caje inara aina niicha ichana jerei coitucuhin, jelai amuritoheriin Acanihane coitucuhin neeichene coina. ¹⁸Chaen nech, “Naaonjoain cohajihachene coinat cana raain nera,” naain coitucuhichene coina inara suujua que coitucueratiha Cana Coaunerane coina caje bajaaun. Jataainte itolere caohacha amurijiriin necaohachae satiiin rai cachaneein nenacaauru que banihateein niicha rucujuei. ¹⁹Nii rijijieeinechu chabana satonoelanaala nenea niicha ichana nainei ichaain, esenetaeraneein nenea coina ichaane coitucuhichene coina caje bajaaun. ²⁰Nii jelai jataain

laraajiin mijjainetiin nenea niicha ichana naineite coaratelu, o caje rai Calaohi Jesocurisito ichateein que jauriineein teein, ²¹itolere cocoainana-caaihuri, curuaanaacuru, naaonjoainuri amurijiriin cocoainanacaineein niha ena janonaa que, chaen nii baiha neeni janonaa que, naaonjoain quene coina. ²²Nitohaneein itolere curuaanaanein Jesoso cocoaainainte, satiiin niicha ranojoihunru, rai cachaneein nenacaauru iclesia curuaanaanein telu, acaauru suujua raujiaeraneein nihane coina. ²³Nii jaunte, satiiin niicha ranojoihunru- rai jaberoco iclesianein neeuruhane jaun, itolere que Jesocurisito corihaneraneein neeure. Nii Jesocurisito corenihate ne satiiin itolere. Nihei colane nenea nainihe itolere cautene rijihuru.

**Jataain cana belaiha Cana Coaunerane
corenihate cana osa caje
nichoterichaachein**

2 ¹⁻²Jauriaalute, ichaauruha cana rai chauratane sacutaain nenacaauru cachaaaurune rijijieein, baaso ichaechajeein osaque nesarujueein ichaohichene jaun, nitajenaanein nerejetocoichelu, Cana Coaunera coitucunaa jeriheichuru suujua saruera moconajaera inara suujua saruhane rijijieeincha ichaohichene jaun. ³Nitohaneinte jauriaa joareein cana suujua letono rijijieein, baaso ichaechajeein jerichaachene rijijieein ichaorejetocoaachelu satiiin. Nii jerichaachene rijijieein, cana suujua letononeein baaso ichaechajeein, osa que nesarujueein ichaohacachelune jaunte niqui, cana casetecaane rai nelu Cana Coaunera. ⁴Nete jataain cairichaaajoaain cana coaraain cana belaihane jaun, nii osa que nesaruhin inae nitajena neein nihacachene jana, ⁵rai Calaohi Jesocurisito aina cuaain,

cana osa caje cana coulucohin nelu
 Cana Coaunera, chabana nitajenaa
 charanejeein nenea ichaonaa que
 ichaohin nenea nainichaachene coina.
 Jataain caohachanijihane jaunte, inara
 osa caje nichoteeichene jaanu terate
 inara rai. ⁶Nii jeelai Acate, inae
 ohacachene bana, nitaje rai niha cana
 suujuene jana, o caje rai Calaohi
 Jesocurisito ichtatihane jiniichaain cana
 suujue ichtatein raain, rohan cana
 suujue lauriaelu dedeeu. ⁷Nitohaneente
 ichaelu, caa baiha rai Cojoanonaa neeni
 que neein jataain cana belaiha rai
 Calaohi Jesocurisito aina cuaritaainne
 coitucunojoneein nihane coina. ⁸Inara
 belaiha Cana Coaunerane jaunte nii
 esenetaaichene jaan aina cuaain nii
 nichoteeichene jaan raain neeiche. Nii
 jaun coatiha inara raajenhane
 inaraacha eruineein nihei. Acate inara
 rai Cana Coaunera tenojoneein ne.
⁹Coatiha inara raajenhane inaraacha
 ichai que nii inara osa caje
 nichotiheeiche. Niicha ichoterate-
 nohineente nii inara osa caje
 nichoteeiche. Nii jaun nainiheeiche
 inara raajenhane, nii inara osa caje
 nichotena rijiitiin, nii que ereein
 necohasitaachene. ¹⁰Acate rai Calaohi
 Jesocurisito aina cuaain cana
 coaunaain nelu, coujuriu rai
 cachaneein, aca- Cana Coaunera nihane
 corojeein, ita belaaain, chaaelai lateein
 neeruha leeochoaurune, acaauru
 corootajaneein, naaonjoaain nii
 inoaenlu coausihalune rijijieein
 nihacachene coina.

**Jesocurisito corenihate, leeochangein nii
 chuni coaralanaala ita aina raotojoein
 nihacache**

¹¹Inara Jorioneneeichene jaunte,
 “Jaberoco cari moloelanaala nenacaauru,”
 naain inara curuaateeuore Jorioocuru. Jana

acaauru Jorionecuruhanete, rai jaberoco
 cari molooruhane jaun: “Canate laen,
 Jaberoco cari moloorera neein
 curuaacaache,” naain raaje necurujuate-
 cure. ¹²Esinaente chuhisi jauriaalu, inara
 Jorioneneeichene jaun, Jesocurisito
 cachaneein nenea nainelanaala, niheichu
 Israelitacuru rene turuhin, ita rai ereein,
 naaonjoana nainerejeteneeichelu, nii que
 coacuhin neeuche. Chaen techu, nii niicha
 ichanenu naitoonjoan tenaa nainenelu
 inara rai Cana Coaunera, inara que
 jaolecohane jaun. Nii jaunte colane nenea
 rijijieein, inara corootajanerihanane cohana
 coacuelanaala nitajenaanein neeichelu.
¹³Nete sатиin coreniha ohalu rai Calaohi
 Jesocurisitone jaun, nii rai coichana aina
 cuaain coreniha atiin Jorioneneeichene
 saijieein inara raain ne, inara netonai
 esenetaaichene jaun. ¹⁴Nii Jesocurisitote,
 canacaanu Jorionichaanune, inara Jorione-
 neeichene aina ita que nejeratenaanein
 ita coarajenaa caje, ita jaberoco que
 jaberocoanaa rijijieein raotojoein ita
 belaaain, ita corootajaneein, naaonjoaain
 nenea coina, nii ita que nejeratenaanein
 nihacachene jaan itajeein, lelaurijiei caje
 nenea rijijieein rai cachaneein cana te.
¹⁵Nitohaneente nii tonoraain niha cachane
 coina nenea rauhi cacha relaalune jaan
 itajelu nii Jesocurisito. Nitohanein
 itajeente, le laurijiei caje nenea rijijieein
 cana raain ne, jiniiquiin raotojoein neein
 le laurijieein rai cachaneein nenea coina.
¹⁶Canacaanu Jorionichaanune, inara
 Jorioneneeichene aina lenoneein, inara
 loreri asaa turunaa nainelanaala,
 naaonjoacaanune janate, coroso que ohin
 nii itajeein, jiniiquii raotojoein Cana
 Coaunera cachaneein nenea coina, ita
 jaberoco que jaberocoanaanein cana te
 Jesocurisito.

¹⁷Nitohaneente Cana Coaunera
 cachaneein nenea naineneeichene caje,
 coreniha inae canacaanu aina jiniiquiin rai

cachaneein nihacachene coina, cana rai nii enachasine ichaonaa que ichaorichaa-cheeine bera Erenaa Raotono turuaelu Jesocurisito. ¹⁸Jataain caohachate ichae cana rai Cana Coaunera, rai Calaohi Jesocurisito aina cuaainte coreniha Jorioniheichuru, Jorioocuru, leeochoaauru cachaauru, naaonjoaihunru aina leinjiin rai Suujueecha coreniha rai inaca Cana Coaunera rene turunaa nainichaache satiin. ¹⁹Aihane jaun inae enene nejelau natane edaa ichaonaa cache rijijieein niheeiche. Inae inara netonaite, aihuruha Jorioocurune rijijieein ne inara rai rahui. Jerichanejeein rai cachaneein neuruha Jorioocurune rijijieeinte, inara netonai, rai cachaneein neeiche. ²⁰Inarate loreri ichacuruha icharaaurune rijijieein, loreri ichanohi rijijieein neeiche. Nii jaunte, nii loreri nunuheneein nenea ajeri rijijieein neuruha Jesocurisito cocoainanohichuru afosotooru aina *profetacurune* jana, inara acaauru ichoae tenojooneein neeiche. Jana Jesocurisitote, nii loreri ichoae satononiha nunaera aina janori bucuneein ne. ²¹Charijjeinteeinti loreri jaane, jauriaanejeein anesijia temuhin jitaain bucutejeein loreri besautiae ichara. Nii rijijieein techu Jesocurisito ranojoinichaachene, inae satiin jiniiquiin rai cachaneein nihacachene jaun Cana Coaunera loreri rijijieein nihacache. ²²Nii rijijieein techu Jesocurisito ranojooneein rai loreri Teenforo rijijieein neeichene jaun, inara suujue jana ichoae Cana Coaunera Suujue.

Jorioniheichuru rai Cana Coaunera ere beebejihane coina letononiha Fabrone

3 ¹Nitohaneeine canu Faboro nichaanne, Jesocurisito coreniha caresero cuhane neeun, inara Jorioneeichene rai caohachanuque. ²Inae coitucuhichene rijijieeinte, jataain inara belaihane jaun, nii inara rai caohacha icharichaaaine beebejeranu que canu

teen nelu Cana Coaunera. ³Acate canu que nii asinojooneein coitucueraelanaala nenea niicha ichanenu coarateein coitucuerate, nii inara rai been laenacaanne rijijieein. ⁴Inae ereretaain coaraqichenete, esinae rauhijiriin Jesocurisito aina cuaain Cana Coauneraacha ichaneni asinojooneein nenea coitucuhanune coitucuriquicheein. ⁵Coatiba niqui nii chuni que nii coitucueratein niheiluu jauriaa. Nete inae enene rai afosotooru, rai *profetacuru*, naaonjoainuri que coarateein coitucuerate rai Suujue aina cuaain Cana Coaunera. ⁶Niicha ichaneni asinojooneein coitucueraelanaala nenea niicha coitucuerateite, nii osa caje cana ichoteraanunein nenea esenetaauruha Jorioniheichuru netonaine jaun, inae acaauru netonai Jorioocuru rai niicha teeni raauruhane rai neeure. Inae acaauru netonai, rai jaberoconein neeuruhane jaunte, rai Calaohi Jesocurisito aina cuaain niicha teeni eroranein neeurureein.

⁷Jataain baaso ichaechajeein ichaoretocooanne saijieeinte, itolere ichana nainihane jaan ichaain, quichao coreein, niicha ichanenu beebejihanune coina canu telu Cana Coaunera. ⁸Nitohanein leeochoaauru, rai cachaneein nenacaauru amurijiriin baasonein chaque nelatenihanune saijieeinte, canu janijiin canu cocoainaan Jorioniheichuru rai janiinacajelanaala caohacha icharihani Jesocurisitone que, caohati erenaa beebejihanune coina canu raain nelu. ⁹Chaen techu niicha ichaneni itolere bana coitucueraelanaala asinojoonein nenea coarateein, inara que coitucueratihanune coina caletoea nii itolere Coauneranein nenea Cana Coaunera. ¹⁰Nitohaneinte ichaelu, ena caje coauneein janijiin niicha ranojoihunru aina cuaain, itolere niicha coitucui

ichana nainihane coaracuruha dedeeu mijiainetiin nenacaaurune coina. ¹¹Cana necoaauna ajiniha caje coauneen, chabana satonoelanaala inae nitohaneen icharihanine coina coausihalune jaunte, nii coaualune rijijieen rai Calaohi Cana Curuaanaa Jesocurisito aina cuaain ichae. ¹²Nii jaunte rai calaohi Jesocurisito aina cuaain inae rene turunaa nainerichaa-cheen, tonajelanaala acanihane esenetaacachene jaanu teranihane coitucuhin. ¹³Nii jaun nainiheeiche, inara coreniha caa caresero cuhane nihanune que nererojoecaain, inara relaunune jaan rijijieen neeichene jianeen neeichene, nenacaenejia inara rai caohacha ichaane ainun, que nellararajiaain neeichene coina.

**Naaonjoainte cana belaiite Cana
Curuaanaa Jesocurisito.**

¹⁴⁻¹⁵Nii corenihane, satiin rai cachaneen dedeeu, caa cana rai chauratane que, naaonjoaain laurilauri neinichaachene Inacaneen nenea Cana Coaunera bajaranacoon neseonriaain. ¹⁶Jerichanejeeinnechu inara rai, Suujue aina cuaain chachana naineen laraajiin neeichene coina, acaihaniji rai jataain caohachaneen nenea tiha inara suujuaune coina Cana Coaunera bajaau. ¹⁷Chaen inara suujuau ichaonaa nainiha esenetaaichene coreniha Jesocurisito Suujuene coina, nitohaneen nii jataain inara belaiha Jesocurisitone esenetaain, jerihane rijijieen neen sachichenete, ¹⁸satiin esenetaeraauru aina jiniiquiin, naaonjoaain itolere cautenu rijihuru ichaa cana belaiha Cana Coaunerane coitucuriquicheen. ¹⁹Nitohaneenne jataain coitucunaa nainichaachene amuritoheriin cana belaiha Cana Coaunerane coitucuhichene coina Cana

Coaunera bajaau, Aca Acaneen nihane coitucuhin, Acaacha cohajeen queecha jaeequiin neen leeochoa coacuelanaala Cana Coaunera ainaacha neeichene coina.

²⁰Aihane jaun, Acaneen nihane coitucuhin Aca coroaecaachenete ne, jataain coaaucaachene amurijiriin cana aina cuaain itolere niicha ichana naineen ichana nainihane jaun. ²¹Jerichanejeein chu coroaecuruhine, rai Calaohi Jesocurisito aina cuaain niicha ranojoihunru cachaauru, cana janonaa besaute que turuhanereen tiaain. Nitohanemiin.

**Cana Coaunera Suujue aina
cuaain ita jaberoco que
jaberocoanaa rijijieen neeuche.**

4 ¹Nii jaunne Jesocurisito coreniha cau caresero cuhane netiin atiin inara rai aitoon, esinae rauhijiriin caohachaain inara suujua coaraain Cana Coaunera ranojoneen neeichene jaun nitohaneen ichaaoche. ²Leeochaauru amurijiriin nenea coacuelanaala, leeochoauru belaaain, chatohanai ichaa chunocoha inara leeochoaurune niha natiin que inara suujua acateen abaantaain, jiniiquiin ita belaaain neeuche. ³Atiin rai Suujue aina cuaain inara corootajanihane aina, itolere bana jiniiquiin ita suujua rijijieen coacuhin jataain raotojoeen neeuche. ⁴Leinjiin Jesocurisito jaberocohachate iclesianeen ne. Jerichanejeein techu leinjiincha ne Cana Coaunera Suujue. ⁵Leinjiin Jesocurisitohachate Cana Curuaanaa ne. Leinjiinchate ne cana osa caje cana ichoteraanu canaacha esenetai. Jerichanejeein techu leinjiincha ne cana coulucohin cana cojunacatecuruhane jaan baotismo. ⁶Nii rijijieen techu leinjincha ne Cana Coaunera, satiin Inacaneen, satiin

ichoae neein, sатиin suujue cuhane neein aina cuaain itolere icharaneein.

⁷Nete laen tenaa jerihane jaancuru rai le cachanichaachene nainetiin aina cuaain cana que niicha icharatei ichaain nihacachene jaanu te. ⁸Nii quete:

“Dedeeu cuhinte jiniichaain caseteconeein nenacaauru amaain, cachaauru que niicha icharatei ichacuruhane jaanu te,” naain belu rai Quiricha Inoaensi cuhane.

⁹Nii Dedeeu cuhalune que aitohane jaante, jauriaanejeein cana rai chauratane que turuhin nihalune baiha, jelaiha cuhalu dedeeune que aite. ¹⁰Nii jeelai dede caje unaate, jelaiha dedeeu cuelu, Aca acaneein itolereenein dedeeu netonai Acaneein nihane coaratihane coina. ¹¹Acatechu, tabaauru sacuure-raauru cocoinae afosotoneein curuaatenajaain. Jana tabaaurute cocoinae *profetanein*, jana tabaauru nosa caje jianacoo neeururichaain cachaaurune beranein, jana tabaauru esenetaain rai cachanein nenacaauru beraicha fastoronein cocoinanajaen, jana tabaaurute acaauru relaeranuurune que cocoinae. ¹²Nitohaneinte acaauru relae ita belaaain ita coroatajanein neeuruhane nefaa rai jaberoco iclesiane coina, ¹³jerihane rijijieein, jiniiquiin ita suujua rijijieein coacuhin niicha ichanenu ichaane coitucuhin nihacachene coina. Nitohanein nihacachenete laen, esinae rauhijiriin itolereenein jiniiquiin canaacha esenetai aina ijiin, aiha Jesocurisitone rijijieein nerichaachein. ¹⁴Inae laen aihuruha canaanainurune rijijieein, joareein cana suujua letonoacha ichajeein, joanreein cana relaera esenetaelanaanein nechu jataain baaso que cana coritana jeriha cachaauru baasoneein ichaonacaaurune nihanatiin esenetariaacachein. ¹⁵Nenacaeneintejian

caohachae, esinae rauhijiriin ita suujua rijitojoein, ita rai ereerejeein, jeriha Jesocurisitone rijijieein ijieein ichaohacachene caohachae, aca cana suujua temura rijijieein nihane jaun. ¹⁶Nii jaunte rai jaberocoenein nenea rijijieein neein ita suujua rijijieein coacuhin raotojoein nihacache. Nitohanein neeinte, cana rai niicha tei aina cuaain jiniiquiin canaacha ichana nainei ichacaachene aina raotojoein ijiin nihacache.

**Jesocurisito ainate, enachasine
ichaonaa que ichaohacache.**

¹⁷Atiin Jesocurisito corenihane, caa que inara rai erenaa jereeun. Jiaonriha inae nenacaaen aihuruha, Cana Coaunera coitucuuruhine rijijieein ichaohichene. Acaaurute joareein suujua letonohacha ichajeein, niicha ichai coitucuelanaa chachaaain neeure. ¹⁸Nii jaun coatiha niicha tei ichaonaa que ichaauruhi baasohacha coaauca acaauru suujuane jaun, nii niicha tei ichaonaa que jaolecooruhane jaun. ¹⁹Nitohanein nauhacaa acaauru suujuane jaunte, inae ichaonaa baaso que ichaohin, rai nichao colalajilanaala itolere baaso ichajeein ichaao. ²⁰⁻²¹Nete laen inara nabana nitohanein ichaohichene coataa, Jesocurisito coitucuhin neeiche, esinae rauhijiriin naitoonjoan aonaain tonoraain neeuche. ²²Aihane jaun nii jauriaanejeein inara ichao, nechu inara coritaa inara suujuane sacuha baaso ichajeein ichaohichene jaan jianein ichaaoche. ²³⁻²⁴Inarate inae nainequiche inaraacha coacui coreein, inara suujue corein, naaonjoain ichaohin, nii ena jerihane rijijieein ichaohichene coina Cana Coaunera tenojoin ichaonaa que ichaohin, inae esinae rauhijiriin ichaonaa esine que ichaohichene coarateein neeichene caohachae.

²⁵Aihana jaun inae ita jaberoco que jaberocoanaa rijijieein nihacachene jaun,

le cachanequichene inae nainiheiche inara amute cacha coritaachene. Chaelai que erenaa jeriquichene, esinae rauhijiriin nohanelanaala aitocuche. ²⁶⁻²⁷Jiaonrihachu ita que nejerateein ita sonaa coacuhin neeichene. Itaque nejerateeichene nii rijieoritiin baitecuche. Coa inara suujua cuhane enoha moconajaerane jaanu tera tocohanein sonafaajein obaecache. ²⁸Asijiautoneein ichaorejeti, asijiauhane jianein amihaneinetete, chaelai sirijieecane, chalateraauru rai chaelai tenaa nainemii. ²⁹Jiaonriha erenaa baaso que ereeiche leeochoauru raine. Erenaa caohacha nejesina que ita rai ereeuchete, caohati erenaa que aitocochene aonaain, jeelai amuritoheriin esenetaain tonoraain neeuruhine aohanraauru cachaauru. ³⁰Inae ecu tihane bana, inara osa caje nichoteeichene caina jelai teein rai cachanequichene jaan cojunacanein inara cojunacatiha Cana Coaunerane jaan rai Suujue nocoeje chanuera tocohanein nena nainiheiche.

³¹Jiaonriha obajeein, ita cotaairiin, ita que nererojoecaeriin, leeochoauru que ereein, naaonjoaain neeichene. ³²Charijieinteinti Jesocurisito coreniha, inara osa que suujua acatein ne Cana Coaunera, nii rijijieein ita que inara suujua acatein, jiniiquiin ita belaa in ichaaoche.

Chatohanein nainere ichaoha Cana Coaunera cachaaurune.

5 ¹Jataain inara belaa in rai calaohinein teein inara raa Cana Coaunerane jaun, inara netonai belaa in naitoonjoan tonoraain ichaaoche.

²Charijieein teinti rai coichana aina cutaain jataain cana belaihane jaun chaelai jujui mocohin que Cana Coaunera belaihurua saseredotecurune

rijijieein cana coreniha rai jaberoco telu Jesocurisito, nii rijijieein inara coichana aina cutaain jiniiquiin ita belaa in ichaaoche.

³Inae inara, rai cachanein neeichene jaun, inae nainiheiche leeocho ene coacuhin, niheichu que ninichajejin, erenaa baaso que ereein, inaraacha lateeicha que coacuhin, barijiitiin, naajoain ichaonaa nainiheiche.

⁴Jiaonriha erenaa baaso que ereein neeichene. Coatih cha que nelatejeehai niritiin iriha cachane. Nenacaantejian, niritiin erenaa coacuelanaala, Cana Coaunera corojeein ichaohichene caohachae. ⁵Inae coitucuhiche, sinijera-nelanaala nena ene aina ichaohin, erenaa baaso que ereein, niicha lateeicha que coacuhin, barijiitiin ichoae, nii Cana Coaunera aina Jesocurisito Cojoanona que ichaonaa nainihe. ⁶Jiaonriha rai suujua caje rocohin joanreein inara rai chaque iriha cachane tonoraain neeichene. Nitohanein joanreein rai suujua caje rocohin erenacaaurute, raujiaerilanaala casetecareein Cana Coaunera, rai aitoonjoan tonoraelanaala que jaolequiin aitocuruhane coreniha.

⁷Aihana jaun acaauru rijitiin ereein, acaauru rijijieein ichaonaa nainiheiche inae inara. ⁸Inae nocohena tabai jana nena rijijieein ichaorejetocoichelune caje, ena Jesocurisito esenetaain naitoonjoan tonoraichene jaunte, inae nii nocohena caje jianacoon ena ichaohiche. Aihane jaun cojoeriin jianacoon ichaohichene coarateein, ⁹chaelai lateein neeuruha leeochoaurune acaauru coroatajanein, esinae rauhijiriin baaso ichaelanaala, niheichu nohanelanaala, naaonjoaain ichaaoche.

¹⁰Atiin Cana Coaunera jerenohicha ichajeein ichaaoche. ¹¹Jiaonriha nii nocohenaanau nena rijijieein, chachae-

raauru cachaauru rijijieein ichaohichene. Acaauru rijijieein ichaonaa coacuelanaala, nii nocohena caje acaauru mitaauchete, acaauru netonai jianacoon mituhin, niicha ichai coaraain coitucuhin ichaauruhine. ¹²⁻¹³Jataainte coejenacaain benacatocojoelanaala nihanatiin, asinojoneein chachaain neure. Nete inae nii nocohena caje mitanjaachene jianacoon neuruhane, jitariin niicha ichai coitucuhin coaraain neurureein, inae jianacoon nocohena caje mituhin neuruhane. ¹⁴Nitohane que tejian: “Sininaa rijijieein neeichene caje inara nota jirichaauche. Ohin nitajeeichene rai neeichene caje Jesocurisito aina ichaaochete, inara que itolere coarateeinet, coaraain coitucuhichera,” naain ne erenaa. ¹⁵Aihana jaun chatohane ichaquichene que necohalajii neeuche. Jiaonriha chacoitucuhi cacha rijijieein ichaohichene, itolere coitucuhin, itolere que nainaan ichaauche. ¹⁶Atiin necohalajii neeuche, jataain baasoneein ichaonacaauru cachaauru cataaun ichaohichene jaun. ¹⁷Jiaonriha chacoitucuelanaala nenacaauru cachaauru rijijieein, joareein chachaain nena coacuhin neeichene. Atiin jeriha Cana Coaunerane rijijieein inaraacha ichai ichaain ichaauche. ¹⁸Jiaonrihachu ajeichene, nabana ajenaacha que coacuhin baasohacha ichajeein ichaohichene, inara ichao aasajeein neeichene coataa. Nenacaen tejian, ajenaa coacuelanaala Cana Coaunera Suujue jerenohi nejesinaacha que coacuhin, jerihane rijijieein ichaohichene caohachae. ¹⁹Nejesinajeein ita rai salmo beebejeein, nenatenanaja que nenateein, inara suujua aina cutaain Cana

Curuaanaa corojeein rachoojoeuche. ²⁰Itolere bana Cana Curuaanaa Jesocurisito aina cuaain, Itolere Inacanein nena Cana Coaunera coroaecuche itolere niicha tei coreniha.

**Raotojoeein sinijiera aina ichaauruhine
Jesocurisito ranojoihunru.**

²¹Jesocurisito que inara suujua acatequichene coarateein, jiniiquiin ita suujua rijijieein ita belaaichaauche. ²²Enecuru nihanatiin jeriha Cana Coaunerane rijijieein jerecuruha acaauru lanaaurune rijijieein neuruhine. ²³⁻²⁴Charijieein teeinti niicha ranojoihunru iclesia neein nenacaauru coturineein niha Jesocurisitone jaun, rai jaberoconeein itolereinein jerihane rijijieein neure niicha ranojoihunru, nii rijijieein rai sinijiera coturineein neuruhane jaun, rai lana jerihane rijijieein nere tonoraain ichaauruhine enecuru. Nii jeelai Jesocurisito techu, nii rai jaberoconeein nenacaauru iclesia ichoterateraneein ne. ²⁵Charijieein teeinti rai coichana aina cutaain, jataain niicha ranojoihunru belaihan jaun, acaauru coreniha rai jaberoco telu, sohin jaaoruhane caina Jesocurisito, nii rijijieein rai coichana aina cutaain sinijiera jereein belaihuruhine acaauru lanaauru. ²⁶Nitohaneinte niicha ranojoihunru coulucoelu rai naitoonjoan aina cuaain, acau que camujuaain, ²⁷esinae rauhijiriin niicha ranojoi iclesia neein, jelai tein rainein que banijiaain necaohachaaain osa colane neuruhane caina. ²⁸Charijieein teeinti ii rai caohachanu ichaain neei, nii rijijieein ii comasai rai netonai caohacha ichaain neeu. Rai comasai belaaichaoi cachate, raaje rai caohachanu ichaaicheein. ²⁹⁻³⁰Nihei chuni raajenihane rai jaberoco que nejerateein nei. Nitoha-

neen nenea coacuelanaalate, raotojoein lenoneen, rai jaberoco colalajiin ichoae. Nii rijijieein techu, rai jaberoco rijijieein neeuruha niicha ranojoihurine jaun, acaauru colalajiin ichaolanajaen Jesocurisito. Canate nii jaberocooneen nihacache. ³¹Nii quete:

“Nii jaunte rai inaca aina rai neba naaonjoain ratiriin, rai sinijiera raain nereein cache, ita jaberoco que jaberocoanaa rijijieein neeuruhane coina,” nae Cana Coaunera Quiricha cuhane. ³²Niite asinojoin rijijieein nihane jaun, coitucunaa nainene chuni. Nene laen canu, aiha niicha ranojoinunru iclesia aina Jesocurisitone que aitoon. ³³Aihane jaun le cachaauru rai jabereco belaihanerijitojoein rai sinijiera belaihanerijitohine. Enecuru netonai rai lana que suujua acateen, niicha jerei rijijieein neeuruhine.

**Inaca ere tonoraain ichaauruhine
acaauru calaohichuru.**

6 ¹Ranunacuru, enamanaacuru, naaonjoaineeichene, Cana Coaunerane belaihanerijijieein inara inacaauru belaihanerijijieein inara inacaauru ere tonoraain neeuche. ²Jauriaa nejeen tonoraain ichaoha cachane, rai tihane coina Cana Coaunera aitoonjoate: “Ii inaca, ii neba, naaonjoainuri belaihu Cana Coaunera belaihanerijijieein, ³raotojoei ichaonaa que nerausiaaejeen ichaohi,” naain ne Cana Coaunera Quiricha cuhane.

⁴Aihana jaun, inara acaauru inacaneen, inara belaihanerijijieein inara relaa Jesocurisitone rijijieein, inara bereecuru baijiaelanaala belaihanerijitohane ichaane coataa suujuateen relaauche.

⁵Nii rijijieein chu caa cana rai chauratane que acaauru fatorooneen nenacaauru ere tonoraain, que suujua acateen, amurijiriin nenea coacuelanaala, que asinojoneen cha coacuela-

naala, naaonjoain neen letoaane jaan ichamiin rai cache, Jesocurisito rai ichaane rijijieein. ⁶Cojuriu Cana Coaunera cachaneen neeichene jaun, jerihane rijijieein inara fatoroon icharatenohin ichaain neeuche. Jiaonriha nechu inara aina caohachaain nihane coina, notaracaacha caohachaain chachaain neeichene. ⁷Inara letoaane jaan ichaquichene, jiaonriha rai ichaquichene que coacuhin ichacache, Cana Curuaanaa Jesocurisito rai ichaquichene que coacuhin, corajeen ichacuche. ⁸Fatoroon cachaneen neen, fatoroon cachanela-naala, naaonjoain netiin, caohacha ichaachane, rai cainarihani cana Curuaanaa, niicha ichai rijijieein coitucuhin neeuche.

⁹Jana inara acaauru fatoroon nequichene, nii leechaneen chuni coaraeniha Cana Coaunerane coitucuhin, nii inara que suujua acateen jeriquichene rijijieein neeuruha inara cachaaurune rijijieein, inara netonai acaauru que inara suujua acateen nii chatohaneen acaauru tenaa coacuhelanaala, naaonjoain acaauru belaihanerijijieein, inae acaauru aina jiniiquiin Cana Coaunera cachaneen neeichene coitucuhin.

**Jesocurisito aina cuain
laraajihururichaain niicha
ranojoihurine.**

¹⁰Jesocurisito aina jiniiquiin neen, nii itolere que laraajin neeichene jaanu niicha teenu aina cuain, itolere que laraajin neeuche canejeraauru.

¹¹Nabana inara coritaa moconajaerane esenetaain neeichene coataa, que acatena nanequichene coina, inara bijichune, inara rai Cana Coaunera tenojoi que acateen tonoraalanaala neeuche.

¹²Coatiha cana tocohaneein cachaneen

bucuhin nenea, cana que nejerateein cana saruhin nihein. Acaaurute moconajaera letononeein dede caje uhin, nechu joanreein baasoneein cacha saruhin, Cana Coaunera coitucuelanaala nenacaauru que niicha ichana nainei ichaane coina letononeein nenea neeure. ¹³Aihana jaun inara rai nitohanei acateein neeichene jaanu que, inara rai Cana Coauneraacha tei aina jatoroaain neeuchete, chatohaneein inara tenaa coaauca moconajaerane niha natiin, abaataain amuritiin neeiche. Inaen leesajeein jatoroaain neein amuritohichene, nii namuritoratena coacuelanaala neeuche.

¹⁴Nitohaneein namuritoratelanaala, niheichu nohanenea coacuelanaala, naaonjoaain neein esinaen rauhijiriin ichaohichene que necouhateein neeuche. ¹⁵Itolere bana jatoroaain neeuchete, Ena Nenea ichaonaanaja que jiniiquiin raotojoein neriquicheeinne coina beratenojoi beebejeiche amuhemujeein. ¹⁶Nii itolere caje inara ichoteratena nainera inaaraacha esenetai, moconajaera rai usi cofatojoi bujuatein caje inara ichoteratemiin. ¹⁷Jana inara rai Suujue tenojoi rai Nere, inara biji achune neeine. Jana nii jianacoon cha ujuaihonelanaala neeichene coina inara mitaera, inara asihoneein inara coturi bujuatera niha neeine, chatohaneein inara amuritonaa nainiha moconajaerane coataa. ¹⁸Itolere bana Cana Coaunera bajaebajajeein, rai

Suujue jerenohin rijijieein neeuche. Itolere que nainaain jatoroaain inara suujua corelanaala neein, satiin rai cachanein nenacaauru coreniha Cana Coaunera bajaauche. ¹⁹Bajaichene nainein, atiin canu coacuhin canu rai netonai bajaauchete, canu rai laraajiiin ereein nihanune jaanu teeine ne, aina laraajiiin ereein Aca cana osa caje cana ichoteranihane beebeje coitucuelanaala nenacaauru raite coitucuurumii. ²⁰Acate corenra niha canu tein rai naitoonjoan beebejihanune coina caletoaain ne. Nii corenihate caa caresero cuhane canu enoaauruhane jaun, ena caresero cuhane neeun. Chaque casilanaala, Acanihane beebejihanune coina canu rai atiin bajaauche.

Necoiha Faborone.

²¹Canu rai Cana Coaunera tenojoin amihanenea que casuujua rijijieein cacorataanera cana nejera Tiquicote, inara rai canuhacha ichai beein, canu ichaone maajeein bereein. ²²“Naaonjoaainne nihacaanu,” naain inara rai beein, inara suujua aninoane coinane nii inara rene letoaaun. ²³⁻²⁴Cana Inaca Cana Coaunera, rai calaohi Jesocurisito aina esenetaain jiniiquiin ita belaaain raotojoein ichaauruha canejeraaurune jaannu teeine. Jerichanejeeinchu itolereenein, satiin belaaain naitoonjoan rijijieein jianelanaala nenacaauru canejeraauru rai, raotojoein neeuruhane jaanu teeine.